

ESERERASHI

Ikantakerira koveenkari Suro

1 ¹Impogini^a itsititanakerora Suro ipegakara igoveenkariegite Peresua-kunirira, yogari Tasorintsi iniasurenta-keri kameti ontsataganakempara ikantakeririra pairani Jeremiashi. Impo irirori ikamantakagantaigakeri maganiro yashintaigarira, aikiro itsirinkaigakeri ikanti: ²“Ikantake Suro igoveenkariegite maganiro Peresuakunirira ikanti: Yogari Tasorintsi timatsirira enoku ipegakagakena koveenkari nagaveaigakerira tovaini koveenkaripage nashintaigakarira iriroegi intiegiri aikiro maganiro yashintaigakarira. Maikari maika ikantakena novetsikakagantakerira ivanko anta Jerosarenku Joraku. ³Maika yogaegiri iseraereegi konoigakempirira kametitake iriaigakera anta Jerosarenku Joraku irovetsikaigaenerira ivanko Tasorintsi natsirira anta, irirotari Tasorintsisanorira shintaigaririra iriroegi. Irirori inkavintsaaageigakerira irimutakoigakerira aigaatsinerira. ⁴Yogaegiri garira iaigi, tyarika inaigake kara irimuigaketyo iriroegi aikiro impaigavakerira perata, kori, arakintsi-page, piratsipage ontirika tatarika oita pashini ikogaigakerira impimantaigakera kameti iragaveaigakeri irovetsikaigaenerira ivanko Tasorintsi natsirira Jerosarenku.”

Iaigaira iseraereegi Jerosarenku

⁵Impogini iaiganake itinkamiegi iyashikiiganakerira Jora intiegiri itinkamiegi iyashikiiganakerira Vejamin itentaiganakarira saseroroteegi intiri irevitaegi. Iaigake maganiro iniasurentaigakerira Tasorintsi iriaigakera irovetsikaigaenerira ivanko. ⁶Impo maganiro terira iriaige imuigavakeri ipaigavakerira posantepage arakintsi-page punavagetacharira okonogaka inti ovetsikantunkani perata, pashini inti ovetsikantunkani kori. Ipaigavakeri aikiro piratsipage, ontiri aikiro tatarika oita pashini ikogaigakerira impaigavakerira. ⁷Yogari Suro inoshikagetairo nagevetankicharira ivankoku Tasorintsi yagetakitirira pairani koveenkari Navokoronosore Jerosarenku yogageta-kerora ivankoku itasorintsiiegite ⁸... ipagetavairira itinkami iyashikiiganakerira Jora paitacharira Sesavasare.

2 ⁶⁴Maganiro aigankitsirira inti ikaraigake 42,360. ⁶⁵Yogaegiri ironampiriaegi surariegi ontiri tsinaneegi ikaraigake 7,337. Iaigake aikiro matikaigatsirira surariegi ontiri tsinaneegi. Maganiro ikaraigake 200. ⁶⁶Yagaiganakeri ipira kañorira kavayo ikaratake 736, aikiro mora irirori 245, ⁶⁷impo kameyo 435 intiri aikiro ashino 6,720.

a 1.1 Esererashi *Esdras*: inti saserorote aikiro inti gotagantirorira Itsirinkakotanakerira Moiseshi. Ne. 8.1.

⁶⁸Antari yogonkeigakara Jerosarenku yogaegiri itinkamiegi ipaigakeri tesorero magatiro ikogaigakerira paniropage impaigakerira kameti oveysikaenkanira ivanko Tasorintsi.

⁶⁹Onti ipaigakeri akatirika inintaigake impaigakerira, ikonogagarantaigaka shintasanoigankicharira ipaigakeri tovaiti. Yogari maanirira yashintaigaka maanityo ipaigakeri. Antari yapatotakara maganiro kori ipaigakeririra onti ikaratake 488 kiro, yogari perata onti ikaratake 2,750 kiro. Ipaigakeri aikiro 100 manchakintsi yogaguigarira saseroroteegi.

⁷⁰Yogaegiri saseroroteegi intiegiri irevitaegi itentagarantaigakari pashini pigaigaacharira itimaigapaakera Jerosarenku. Yogaegiri matikaigatsirira intiegiri shireaigirorira ivanko Tasorintsi intiegiri aikiro tavageigatsirira ivankoku onti itimageigapai tyarika kara itimaigavetara yashikiiganakeririra pairani.

Oveysikaaganira itagantaganirira piratsi ivankoku Tasorintsi

3 ¹Impogini yaganakara kashiri 7 maganiro iriroegi iseraereegi iponiageigaka itimaigakera ipokaigake Jerosarenku yapatotaigakara.

²Impogini yogari itomi Josarako paitacharira Jesoa itentaigakari itovaireegi saseroroteegi intiri aikiro itomi Saratiere paitacharira Sorovaveri intiegiri itovaireegi irashi irirori yovetsikaigairora itagantaganirira piratsi yamaganirira Tasorintsi kameti intagai-gaenerira inkañotagaigakerora okantakerira itsirinkakotanakerira Moisheshi iromperane Tasorintsi. ³Onti yogaigairo onavetara pairani impo shintsi itagantaiganakeri Tasorintsi

piratsi ipinkaigakeritari yogaegi timaigatsirira kara terira iriroegi iseraereegi. Omirinkatyo kutagiteri itagaiginiri tsitekyamani ontiri inanaira shavini.

Yagataigairora ivanko Tasorintsi

4 ⁴Impogini yogaegiri timaigatsirira kara terira iriroegi iseraereegi iatashiiigakeri vetsikaigairorira ivanko Tasorintsi iromintsarogaigakerira irapakuakagaigakerira ganiri atanatsi yovetsikaigirora. ⁵Aikiro ipunaigakeri inampinaegi koveenkari Suro iriniaiga-kerira intsoeventaigakemparira. Ario ikañoiigakero maika tovaiti shiriagarini kigonkero ipegakara koveenkari Irario. *Kantankicha tekyara impegempa koveenkari Irario, iketyo pegankicha pashini paitacharira Aretajerejeshi. Antari ipegakara koveenkari irirori* ²⁴ario pinkante yapakuakagasanoigakeri kigonkero ishiriagakotakara Irario piteti ipegakara koveenkari.

5 ¹Impogini yogari Tasorintsi iniakeri kamantantatsirira Ajeo intiri Sakariashi itomi Iro, impo iriroegi ikamantaigakeri jorioegi naigankitsirira kara Joraku ontiri Jerosarenku ikantakerira Tasorintsi atanatsira irovetsikaigerora ivanko. ²Impo yogari Sorovaveri intiri Jesoa imaiganairo aikiro yovetsikaiganairora, irirotyo mutakoigavakeri Ajeo intiri Sakariashi.

6 ¹⁵Impogini ishiriagakotanakara Irario 6 shiriagarini ipegakara koveenkari, agatunkani ivanko Tasorintsi oveysikaaganira. Onti agatantaagani kashiri Arare,^b ogari kutagiteri onti 3. ¹⁶Impogini yogaegiri saseroroteegi, irevitaegi intiegiri aikiro maganiro iseraereegi ponaiagaacharira Vavironiaku yapatoventaigakaro ishineveageigakatyo kara ¹⁷itagai-gakeririra

b 6.15 Arare Adar: inti kashiri 12 *calendarioku* evereo.

Tasorintsi piratsipage. Onti itagaigakeneri 100 akamotiakyansirira toro, 200 ovisha antarini intiri aikiro 400 ovisha surari ityomiani. Itagaigakeneri aikiro 12 kavera surari ganiri ikisaviigiri ikañovageigakara.

Onti itagaigakeneri 12, ariotari ikañoigakari itomiegi Iseraere inaigake 12.
¹⁹Impogini yaganakara kashiri 1 ogari kutagiteri 14 yovetisaigake ovisha isekataigakara isuretakoigaarora Pasekoa.